

Ո Ր Ո Շ ՈՒ Մ

Ճանապարհային ոստիկանության վարչական իրավախախտման գործի վերաբերյալ
05.06.2020թ. կայացված թիվ 00646-2 որոշումն անփոփոխ, իսկ վարչական բողոքն առանց
բավարարման թողնելու մասին

<< 11 >> 08 2020թ. 7-13- 9365

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս,
վերանայելով Արմեն Սիրեկանյանի Ն/7/54453-20 դիմումի քննարկման արդյունքում ստեղծված
նյութերը՝

Պ Ա Ր Զ Ե Ց Ի

Արմվյան քաղաքի, Գեղարդի փողոցի, 5-րդ շենքի, 134 բնակարանի բնակիչ Արմեն
Սիրեկանյանը դիմումով խնդրել է բեկանել Ճանապարհային ոստիկանության վարչական
իրավախախտման վերաբերյալ գործով 05.06.2020թ. կայացված թիվ 00646-2 որոշումը՝
նշելով, որ համաձայն չէ որոշմամբ արձանագրված իրավախախտման հետ: Միաժամանակ
հեռախոսակապի միջոցով հայտնել է , որ դիմումին ավելացնելու ոչինչ չունի և խնդրել է
դիմումը քննարկել առանց իր մասնակցությամբ:

Դիմումի քննարկման արդյունքում պարզվել է, որ վարչական իրավախախտման գործի
վերաբերյալ կայացված թիվ 00646-2 որոշումը ենթակա է կատարման հետևյալ
պատճառաբանությամբ.

Վարչական իրավախախտումների վերաբերյալ ՀՀ օրենսգրքի 182.3-րդ հոդվածի 1.1 մասի
համաձայն՝ արտակարգ իրավիճակի հիմքով հայտարարված արտակարգ դրության
ընթացքում ազատ տեղաշարժվելու պայմանները, պահանջները խախտելը՝ առաջացնում է
տուգանքի նշանակում՝ սահմանված նվազագույն աշխատավարձի տասնապատիկի չափով:

Հայաստանի Հանրապետության ողջ տարածքում կիրառվող ժամանակավոր
սահմանափակումների վերաբերյալ պարետի 03.05.2020թ. N63 որոշման 5-րդ կետի
համաձայն՝ ՀՀ տարածքում պարտադիր է հանրային բաց վայրերում դիմակի առկայությունը,
իսկ անձնական օգտագործման մարդատար և բեռնատար տրանսպորտային միջոցներում՝
դիմակ կրելը, եթե վարորդից բացի մեքենայում առկա է առնվազն մեկ ուղևոր:

Ուսումնասիրությամբ պարզվել է, որ 05.06.2020թ. ժամը 09:40-ի սահմաններում Արմվյան
քաղաքում քաղաքացի Արմեն Սիրեկանյանի վարած ավտոմոբիլը կանգնեցվել է
Ճանապարհային ոստիկանության ՃՊԾ 2-րդ սպայական գումարտակի, 3-րդ սպայական
վաշտի, 1-ին սպայական դասակի տեսուչ Ա.Հակոբյանի կողմից՝ Հայաստանի
Հանրապետության պարետի 03.05.2020թ. N63 որոշման 5-րդ կետի պահանջի խախտման
համար, այն է՝ վարողը անձնական օգտագործման մարդատար տրանսպորտային միջոցում՝
չի կրել դիմակ ուղևորի առկայության պայմաններում: Վարչական իրավախախտումների
վերաբերյալ ՀՀ օրենսգրքի 182.3-րդ հոդվածի 1.1 մասով կայացվել է վարչական
իրավախախտման գործի վերաբերյալ թիվ 00646-2 որոշումը:

Ճանապարհային ոստիկանության ծառայողի կողմից տրված պարզաբանման համաձայն՝
քաղաքացի Արմեն Սիրեկանյանի կողմից կատարված իրավախախտումը հիմնավորող
տեխնիկական միջոցների կիրառմամբ ձեռք բերված ապացույցներ առկա չեն, սակայն
իրավախախտումն եղել է անմիջապես իր տեսադաշտում, ակնհայտ և պարզ տեսանելի, ինչի
կապակցությամբ կազմվել է համապատասխան արձանագրություն և կայացվել թիվ 00646-2

որոշումը: Միաժամանակ ոստիկանության ծառայողը հայտնել է, որ իր և վարորդի միջև ծառայողական բնույթի խոսակցություններից բացի այլ խոսակցություններ չեն եղել:

Այսպիսով, դիմումատուի արարքում առկա են Վարչական իրավախախտումների վերաբերյալ ՀՀ օրենսգրքի 182.3-րդ հոդվածի 1.1 մասի հատկանիշները, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման վերաբերյալ գործով 05.06.2020թ. կայացված թիվ 00646-2 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Արմեն Սիրեկանյանին և Ճանապարհային ոստիկանության ՃՊԾ 2-րդ սպայական գումարտակ:



Ե.Կարապետյան

Կատարող՝ Գ. Միքայելյան
Հեռ. 011-54-47-83